

摘藻堂四庫全書薈要

集部

欽定四庫全書薈要

集部

御選唐宋文醇卷四十二

詳校官原任主事<sub>臣</sub>李斯咏



欽定四庫全書薈要

御選唐宋文醇卷四十一目錄

眉山蘇軾文四

論

禮以養人爲本論

既醉備五福論

詩論

禮論

論閏月不告朔猶朝於廟

宋襄公論

伊尹論

周公論



欽定四庫全書薈要卷一萬九千三百五

集部

御選唐宋文醇卷四十一

眉山蘇軾文四

禮以養人為本論

三代之衰至於今且數千歲豪傑有意之主博學多識之臣不可以勝數矣然而禮廢樂墜則相與咨嗟發憤而卒於無成者何也是非其才之不逮學之不至過於論之太詳畏之太甚也夫禮之初始諸人情因其所安

者而為之節文凡人情之所安而有節者舉皆禮也則是禮未始有定論也然而不可以出於人情之所不安則亦未始無定論也執其無定以為定論則塗之人皆可以為禮今儒者之論則不然以為禮者聖人之所獨尊而天下之事最難成者也牽於繁文而拘於小說有毫毛之差則終身以為不可論明堂者惑於考工呂令之說議郊廟者泥於鄭氏王肅之學紛紛交錯者累歲而不決或因而遂罷未嘗有一人果斷而決行之此皆

論之太詳而畏之太甚之過也夫禮之大意存乎明天  
下之分嚴君臣篤父子形孝弟而顯仁義也今不幸去  
聖人遠有如毫毛不合於三代之法固未害其為明天  
下之分也所以嚴君臣篤父子形孝弟而顯仁義者猶  
在也今使禮廢而不修則君臣不嚴父子不篤孝弟不  
形仁義不顯反不足重乎昔者西漢之書始於仲舒而  
至於劉向悼禮樂之不興故其言曰禮以養人為本如  
有過差是過而養人也刑罰之過或至殺傷今更議法

筆則筆削則削而至禮樂則不敢是敢於殺人而不敢  
於養人也而范曄以為樂非變襄而新音代作律謝臯  
蘇而法令亟易而至於禮獨何難歟夫法者末也又加  
以慘毒繁難而天下常以為急禮者本也又加以和平  
簡易而天下常以為緩如此而不治則又從而尤之曰  
是法未至也則因而急之甚矣人之惑也平居治氣養  
生宣故而納新其行之甚易其過也無大患然皆難之  
而不為悍藥毒石以搏去其疾則皆為之此天下之公

患也嗚呼王者得斯說而通之禮樂之興廢乎有日矣  
推明董仲舒劉向之意以立言雖未嘗於漢書禮樂志  
外別有發明然固古今要論亦足見其所述之知所擇  
也雖然論則要矣而自董劉以後迄於蘓軾千餘年而  
三代之禮不可作自蘓軾迄於今又將千年而要亦無  
異於董劉時者豈其間遂無豪傑有意之主博學多識  
之臣讀董仲舒劉向蘓軾之論而慨然興起者乎而何  
以寂爾也蓋禮者動於五性之中而貫徹於五倫之內

即是率性盡倫之實事而非別有繁文曲節之可言也  
是故五性盡而五倫明五倫明而天下治而禮在其中  
矣基諸深宮之中達諸海隅之遠非一手一足之烈一  
時一事之間所得志故曰禮樂百年而後興必也元  
首明而股肱良立綱陳紀始正其大而漸及其細子孫  
相承守其已善而補其未善使人人自得其性自叙其  
倫則舉其所已行之成迹而載之典冊曰禮也云爾記  
曰王者治定制禮豈治定之後別聚文學之士纂輯一

書謂之制禮哉凡其治定之迹皆可以為禮而世守之也若於率性盡倫之大未知如何而專取周旋揖讓升降俯仰之文命之為禮欲四海之大莫不遵而行之宜其議之如聚訟而頒之海內詔書來但挂壁也劉向曰禮以養人刑以殺人制刑則不忌制禮則不敢是敢於殺人而不敢於養人也信已然此養人之禮制之朝廷而行之四海四海不行則將任之乎抑刑之也必曰刑以弼教矣然則民之多辟業已不勝其法網之密忍又

為是周旋揖讓升降俯仰之繁文末節而階之為禍乎  
如曰任之則所為制禮者不過宇內多此數卷文字而  
亦不足以養人矣然則禮固不可為為之其必無日乎  
曰事在勉強而已率性盡倫不可一刻廢則何嘗一刻  
不為禮也若其可以成之為一代之禮而足當為國以  
禮之目則非可以斬其名而飾其貌者也且記固曰禮  
不下庶人刑不上大夫矣乃漢唐以來雖三公可朝爵  
邑而夕罪隸至於儀節之末則襁褓之夫皆欲其奉行



則已非禮也已無怪其不能行而為具文也誠使君公士大夫相與納身軌物朝夕講貫而修習之且勿責之庶民及其至也上行下效萬民自有馴至之勢焉此則所當勉強者也



既醉備五福論

君子之所以大過人者非以其智能知之彊能行之也  
以其功興而民勞與之同勞功成而民樂與之同樂如  
是而已矣富貴安逸者天下之所同好也然而君子獨  
享焉享之而安天下以為當然者何也天下知其所以  
富貴安逸者凡以庇覆我也貧賤勞苦者天下之所同  
惡也而小人獨居焉居之而安天下以為當然者何也  
天下知其所以貧賤勞苦者凡以生全我也夫然故獨

享天下之大利而不憂使天下為已勞苦而不忤耳聽  
天下之備聲目視天下之備色而民猶以為未也相與  
禱祠而祈祝曰使吾君長有吾國也又相與詠歌而稱  
頌之被於金石溢於竹帛使其萬世而不忘也嗚呼彼  
君子者獨何修而得此於民哉豈非始之以至誠中之  
以不欲速而終之以不懈歟視民如視其身待其至愚  
者如其至賢者是謂至誠至誠無近效要在於自信而  
不惑是謂不欲速不欲速則能久久則功成功成則易

懈君子濟之以恭是謂不懈行此三者所以得之於民也三代之盛不能加毫末於此矣既醉者成王之詩也其序曰既醉太平也醉酒飽德人有士君子之行焉而說者以為是詩也實具五福其詩曰君子萬年壽也介爾景福富也室家之壺康寧也昭明有融攸好德也高朗令終考終命也凡言此者非美其有是五福也美其全享是福兼有是樂而天下安之以為當然也夫詩者不可以言語求而得必將深觀其意焉故其譏刺是人

也不言其所為之惡而言其爵位之尊車服之美而民疾之以見其不堪也君子偕老副笄六珈赫赫師尹民具爾瞻是也其頌美是人也其不言其所為之善而言其冠佩之華容貌之盛而民安之以見其無媿也緇衣之宜兮敝予又改為兮服其命服朱芾斯皇是也故既醉者非徒享是五福而已必將有以致之不然民將眴眴焉疾視而不能平又安能獨樂乎是以孟子言王道不言其他而獨言民之聞其作樂見其田獵而欣欣者此

可謂知本矣

至誠不欲速不懈三語聖學聖治之本矣然而本之中  
又有本焉使無以實見乎天理民彝之極致萬事萬物  
之當然則雖愛民發於至誠而愛之轉以害之加以自  
信而不惑歷久而不懈豈不滋病乎神宗之青苗等法  
實欲利國利民非有私也特以不明物理不達人情愈  
至誠愈不欲速愈不懈愈謬以千里故大學曰欲誠其  
意者先致其知致知在格物既醉備五福而以昭明有

融為攸好德非此之謂歟



# 詩論

自仲尼之亡六經之道遂散而不可解蓋其患在於責其義之太深而求其法之太切夫六經之道惟其近於人情是以久傳而不廢而世之迂學乃欲曲為之說雖其義之不至於此者必彊牽合以為如此故其論委曲而莫通也夫聖人之為經惟其禮與春秋合然後無一言之虛而莫不可考然猶未嘗不近於人情至於書出於一時言語之間而易之文為卜筮而作故時亦有所

不可前定之說此其於法度已不如春秋之嚴矣而況詩者天下之人匹夫匹婦羈臣賤隸悲憂愉佚之所為作也夫天下之人自傷其貧賤困苦之憂而自述其豐美盛大之樂上及於君臣父子天下興亡治亂之迹而下及於飲食牀第昆蟲草木之類蓋其中無所不具而尚何以繩墨法度區區而求諸其間哉此亦足以見其志之無不通矣夫聖人之於詩以為其終要入於仁義而不責其一言之無當是以其意可觀而其言可通也

今之詩傳曰殷其雷在南山之陽出自北門憂心殷殷  
揚之水白石鑿鑿終朝采綠不盈一掬瞻彼洛矣維水  
泱泱若此者皆興也而至於關關雎鳩在河之洲南有  
樛木葛藟纍之南有喬木不可休息維鵲有巢維鳩居  
之嘒嘒草蟲趯趯阜螽若此者又皆興也其意以為興  
者有所象乎天下之物以自見其事故凡詩之為此事  
而作其言有及於是物者則必彊為是物之說以求合  
其事蓋其為學亦已勞矣且彼不知夫詩之體固有比

矣而皆合之以為興夫興之為言猶曰其意云爾意有  
所觸乎當時時已去而不可知故其類可以意推而不  
可以言解也殷其雷在南山之陽此非有所取乎雷也  
蓋必其當時之所見而有動乎其意故後之人不可以  
求得其說此其所以為興也嗟夫天下之人欲觀於詩  
其必先知比興若夫關關雎鳩在河之洲是誠有取於  
其摯而有別是以謂之比而非興也嗟夫天下之人欲  
觀於詩其先知夫興之不可與比同而無強為之說以

求合其當時之事則夫詩之意庶乎可以意曉而無勞  
矣

分別比興千古定論若夫睢鳩摯而有別謂是比而非  
興猶是沿習詁訓而未思也關雎只是興聞其關關和  
鳴見其在河之洲因以起興云爾其謂摯而有別正軾  
所謂刻求之過昔人不云乎睢鳩既是鶚類不應以凶  
殘猛鷙之鳥比淑女君子矣若其所稱書出於一時之  
語言易不若春秋之謹嚴語頗率爾讀者節取焉可也

儲欣曰如漢唐注疏云云是古序所謂詩有六義者  
蚤缺其一矣前後相沿不悟得明眼人拈出然後六  
義具而詩教明其有功經籍如此徒竊蘓張之緒餘  
者能乎哉亦好詆之過也

# 禮論

昔者商周之際何其為禮之易也其在宗廟朝廷之中  
籩豆簠簋牛羊酒醴之薦交於堂上而天子諸侯大夫  
卿士周旋揖讓獻酬百拜樂作於下禮行於上雍容和  
穆終日而不亂夫古之人何其知禮而行之不勞也當  
此之時天下之人惟其習慣而無疑衣服器皿冠冕佩  
玉皆其所常用也是以其人入於其間耳目聰明而手  
足無所忤其身安於禮之曲折而其心不亂以能深思

禮樂之意故其廉恥退讓之節睥然見於面而盎然發於其躬夫是以能使天下觀其行事而忘其暴戾鄙野之氣至於後世風俗變易更數千年以至於今天下之事已大異矣然天下之人尚皆記錄三代禮樂之名詳其節目而習其俯仰冠古之冠服古之服而御古之器四偃僂拳曲勞苦於宗廟朝廷之中區區而莫得其紀交錯紛亂而不中節此無足怪也其所用者非其素所習也而彊使焉甚矣夫後世之好古也昔者上古之世



蓋嘗有巢居穴處汙樽抔飲燔黍捭豚蕡稭土鼓而以  
為是足以養生送死而無以加之者矣及其後世聖人  
以為不足以大利於天下是故易之以宮室新之以籩  
豆鼎俎之器以濟天下之所不足而盡去太古之法惟  
其祭祀以交於鬼神乃始薦其血毛豚解而腥之體解  
而爛之以為是不忘本而非以為後世之禮不足用也  
是以退而體其犬豕牛羊實其簠簋豆鉶羹以極今  
世之美未聞其牽於上古之說選悞而不決也且方今

之人佩玉服黻冕而垂旒拱手而不知所為而天下之人亦且見而笑之是何所復望於其有以感發天下之心哉且又有所大不安者宗廟之祭聖人所以追求先祖之神靈庶幾得而享之以安卹孝子之志者也是以思其平生起居飲食之際而設其器用薦其酒食皆從其生以冀其來而安之而後世宗廟之祭皆用三代之器則是先祖終莫得而安也蓋三代之時席地而食是以其器用各因其所便而為之高下大小之制今世之

禮坐於牀而食於牀上是以其器不得有所變雖正  
使三代之聖人生於今而用之亦將以為便安故夫三  
代之視上古猶今之視三代也三代之器不可復用矣  
而其制禮之意尚可依倣以為法也宗廟之祭薦之以  
血毛重之以體薦有以存古之遺風矣而其餘者可以  
易三代之器而用今世之所便以從鬼神之所安惟其  
春秋社稷釋奠釋菜凡所以享古之鬼神者則皆從其  
器蓋周人之祭蜡與田祖也吹葦籥擊土鼓此亦各從

其所安耳嗟夫天下之禮宏濶而難言自非聖人而何以處此故夫推之而不明講之而不詳則愚實有罪焉惟其近於正而易行庶幾天下之安而從之是則有取焉耳

軾與二程同在元祐朝伊川好用古禮軾意不然兩家弟子遂至互相抗侮竟成洛黨蜀黨之目元豐羣小方睽睽伺隙而諸賢不悟自相謗毀至紹聖初乃盡竄嶺海可哀也夫禮者何仁之見諸行事者也禮有古今仁

亦有古今耶苟可以達吾之仁於君臣父子兄弟夫婦朋友之間是則為禮禮云禮云玉帛云乎哉軾之論實有得乎禮之意雖聖人復起不易者也雖然仁之難成久矣必協於無過不及之中而後禮具而仁以昭然則雖有聖人亦不能不監於往古之成憲以求其無過不及之中也明矣縱或信古太篤泥古太深要亦不失為古訓是武威儀是力之君子而軾虐譴之樂聞軾說者遂於好用古禮之人如見怪物焉則又豈禮也哉洛黨

不能堪於是朱光庭賈易輩遂以謗訕朝廷誣軾等則  
更為至無禮而大不仁也已讀軾禮論軾之本意自明  
洛蜀兩家得失之故亦具可考軾不云乎推之而不明  
講之而不詳則愚實有罪焉然則軾又何嘗謂古禮可  
盡廢哉

論閏月不告朔猶朝於廟

春秋之文同其所以為義異者君子觀其意之所在而已矣先儒之論閏月不告朔者牽乎猶朝於廟之說而莫能以自解也春秋之所以書猶者二曰如此而猶如此者甚之之詞也辛巳有事於太廟仲遂卒於垂壬午猶繹是也曰不如此而猶如此者幸之之詞也不郊猶三望閏月不告朔猶朝於廟是也夫子傷周道之殘缺而禮樂文章之壞也故區區焉掇拾其遺亡以為其全

不可得而見矣得見一二斯可矣故書曰猶朝於廟者傷其不告朔而幸其猶朝於廟也夫子之時告朔之禮亡矣而有餼羊者存焉夫子猶不忍去以志周公之典則其朝於廟者乃不如餼羊之足存歟公羊傳曰曷為不言告朔天無是月也穀梁傳曰閏月者附月之餘日也天子不以告朔而喪事不數也而皆曰猶者可以已也是以其幸之之詞而為甚之之詞宜其為此異端之說也且夫天子諸侯之所為告朔聽政者以為天歟為



民歟天無是月而民無是月歟彼其孝子之心不欲因  
閏月以廢喪紀而人君乃欲假此以廢政事歟夫周禮  
樂之衰豈一日之故有人焉開其端而莫之禁故其漸  
遂至於掃地而不可救文十六年夏六月公四不視朔  
公羊傳曰公有疾也何言乎公有疾不視朔自是公無  
疾不視朔也故夫有疾而不視朔者無疾而不視朔之  
原也閏月而不告朔者常月而不告朔之端也聖人憂  
焉故謹而書之所以記禮之所由廢也左氏傳曰閏以

正時時以作事事以厚生生民之道於是乎在不告閔  
朔棄時政也何以為民而杜預以為雖朝於廟則如勿  
朝以釋經之所書猶之意是亦曲而不通矣

據論語以駁公穀其解甚確

# 宋襄公論

魯僖公二十二年冬十月己巳朔宋公及楚人戰於泓宋師敗績春秋書戰未有若此之嚴而盡也曰宋公天子之上公宋先代之後於周為客天子有事燔焉有喪拜焉非列國諸侯之所敢敵也而曰及楚人戰於泓楚夷狄之國人微者之稱以天子之上公而當夷狄之微者至於敗績宋公之罪益可見矣而穀梁之傳以為文王之師不過是學者疑焉故不可以不辨宋襄公

非獨行仁義而不終者也。以不仁之資盜仁者之名爾。齊宣有牽牛而過堂下者，曰：牛何之？曰：將以釁鐘。王曰：舍之。吾不忍其觳觫，若無罪而就死地。夫舍一牛於德，未有所損益者，而孟子與之以王所謂以不忍人之心行不忍人之政，三代之所共也。而宋襄公執鄫子用於次睢之社，君子殺一牛猶不忍，而宋公戕一國君若犬豕，然而忍為之。天下孰有不忍者耶？泓之役，身敗國斂，乃欲以不重傷不禽二毛欺諸侯，人能終其兄之臂以

取食而能忍饑於壺餐者天下知其不情也襄公能忍於鄫子而不忍於重傷二毛此豈可謂其情也哉桓文之師存亡繼絕猶不齒於仲尼之門况用人於夷鬼以求霸而謂王者之師可乎使鄫子有罪而討之雖聲於諸侯而戮於社天下不以為過若以喜怒興師則秦穆公獲晉侯且猶釋之而况敢用諸淫昏之鬼乎以愚觀之宋襄公王莽之流襄公以諸侯為可以名得王莽以天下為可以文取也其得喪小大不同其不能欺天下

則同也其不鼓不成列不能損襄公之虐其抱孺子而泣不能蓋王莽之篡使莽無成則宋襄宋襄得志亦一莽也古人有言圖王不成其弊猶足以霸襄公行王者之事猶足以當桓公之師一戰之餘救死扶傷不暇此獨妄庸耳齊桓晉文得管仲子犯而興襄公有一子魚不能用豈可同日而語哉自古失道之君如是者多矣死而論定未有如宋襄公之欺於後世者也

儲欣云宋襄舉動煩擾雖得天下不能一朝居也的與

王莽一轍然吾謂五霸列宋襄此相傳之謬說其實非也五霸若并前世言之周止有二焉齊桓晉文而已若據孟子書專指春秋亦二百四十年間自有五霸與襄無與也蓋自同盟幽而齊霸戰城濮而晉霸封穀尸而秦霸殺陳夏徵舒而楚霸三駕楚九合諸侯而晉復霸然則所謂五霸者齊桓晉文也秦穆楚莊也晉悼也宋襄何有哉坡公謂其盜仁者之名吾謂其并盜霸者之名而不可以不辨矣欣意謂軾只辨宋襄不足為霸而

不知五霸中實無宋襄也。今按杜預注左傳謂夏霸昆  
吾商霸大彭豷韋周霸齊桓晉文或曰齊桓晉文宋襄  
秦穆楚莊趙岐注孟子用杜預後說荀子稱五霸謂齊  
桓晉文楚莊吳闔閭越勾踐顏師古注漢書則謂齊桓  
宋襄晉文秦穆吳夫差歷代諸說本自不同欣意去宋  
襄用晉悼者則以左傳有晉復霸之辭也晉悼之霸何  
休謂霸不過五不許其霸孔穎達謂霸者強國為之其  
數何有定限斥休為鄉曲之學孔意霸不妨於有六晉



悼自在五霸之外則欣斥宋襄登晉悼以就五數此其立論之本也間嘗論之仲尼之徒無道桓文之事者夫桓文一世之所矜尚而仲尼之徒至不以挂齒豈矯異若是夫亦曰君臣之義自是漓焉爾溥天之下莫非王土率土之濱莫非王臣國天子之國也民天子之民也天子使其國牧其民以守其世祀而乃摟諸侯以伐諸侯陽以尊王室為名而陰以行自雄自長之計逢王室之不造天子僅亦守府乃如其意而與之以長諸侯

是不臣之漸也非君臣之義也夫君臣之義窮天地亘萬古而不變者豈曰將以天下奉一人哉蓋必如是而後乾坤清夷自橫目之民下逮於肖翹之屬始各有所安其食息耳有或為之亂階聖人斷斷乎絕之其為斯世斯民計至深遠也自天下為郡縣以後使有藩鎮之屬為桓文之事者出焉則不待遠識之士而知議其非矣三代公侯伯子男奉天子之命以牧其土與民者具與今之督撫守令有異制耳豈有異義焉乃挾天子以

令諸侯自稱為霸則腐儒猶津津稱道之何異朝四而暮三衆狙皆喜乎然則霸之為名即非懿稱宋襄之不足為霸固矣而欣謂其并盜霸者之名猶以此為美名而有所吝惜則亦猶有蓬之心也鄭康成曰天子衰諸侯興故曰霸霸把也言把持天子之政教也夫把持天子之政教豈仲尼之徒所忍言者乎軾述古語謂圖王不成其弊猶足以霸此語雖出自古尤不可以訓王霸殊途猶東西南北之異轍安得圖王不成而能霸夫有

天下為天子者果其圖王則孟子謂保民而王莫之能禦矣豈有不成僅霸之理非天子也非有天下也則又何得圖王圖王者非即所為亂臣乎足以霸則然矣王其可成哉夫王霸之辨不明則君臣之義不著其為世道人心害非細故也

伊尹論

辨天下之大事者有天下之大節者也立天下之大節者狹天下者也夫以天下之大而不足以動其心則天下之大節有不足立而大事有不足辦者矣今夫匹夫匹婦皆知潔廉忠信之為美也使其果潔廉而忠信則其知慮未始不如王公大人之能也惟其所爭者止於簞食豆羹而簞食豆羹足以動其心則宜其智慮之不出乎此也簞食豆羹非其道不取則一鄉之人莫敢以

不正犯之矣一鄉之人莫敢以不正犯之而不能辦一鄉之事者未之有也推此而上其不取者愈大則其所辦者愈遠矣讓天下與讓簞食豆羹無以異也治天下與治一鄉亦無以異也然而不能者有所蔽也天下之富是簞食豆羹之積也天下之大是一鄉之推也非千金之子不能運千金之資販夫販婦得一金而不知其所措非智不若所居之卑也孟子曰伊尹耕於有莘之野非其道也非其義也雖祿之天下弗受也夫天下不

能動其心是故其才全以其全才而制天下是故臨大事而不亂古之君子必有高世之行非苟求為異而已卿相之位千金之富有所不屑將以自廣其心使窮達利害不能為之芥蒂以全其才而欲有所為耳後之君子蓋亦嘗有其志矣得失亂其中而榮辱奪其外是以役役至於老死而不暇亦足悲矣孔子叙書至於舜禹臯陶相讓之際蓋未嘗不太息也夫以朝廷之尊而行匹夫之讓孔子安取哉取其不及汲汲於富貴有以大服

天下之心焉耳夫太甲之廢天下未嘗有是而伊尹始行之天下不以為驚以臣放君天下不以為僭既放而復立太甲不以為專何則其素所不屑者足以取信於天下也彼其視天下眇然不足以動其心而豈忍以廢放其君求利也哉後之君子蹈常而習故惴惴焉懼不免於天下一為希濶之行則天下羣起而誚之不知求其素而以為古今之變時有所不可者亦已過矣夫

王世貞曰伊尹事功莫大於相湯又莫難於相太甲



放之復之而人不疑其耕莘之心即素取信於人故也論伊尹者無踰此篇

王忠堅曰周公之流言豈其素不如伊尹哉古今之變時有所不可是亦不易之論也



# 周公論

論周公者多異說何也周公居禮之變而處聖人之不幸宜乎說者之異也凡周公之所為亦不得已而已矣若不得已而不已則周公安得而為之成王幼不能為政周公執其權以王命賞罰天下是周公不得已者如此而已今儒者曰周公踐天子之位稱王而朝諸侯則是豈不可以已耶書曰周公位冢宰正百工羣叔流言又曰召公為保周公為師相成王為左右召公不說又曰

周公曰王若曰則是周公未嘗踐天子之位而稱王也  
周公稱王則成王宜何稱將亦稱王也將不稱耶不稱  
則是廢也稱王則是二王也而周公何以安之孔子曰  
必也正名乎儒者之患患在於名實之不正故亦有以  
文王為稱王者是以聖人為後世之僭君急於為王者  
耶天下雖亂有王者在而已自王雖聖人不能以服天  
下昔高帝擊滅項籍統一四海諸侯大臣相率而帝之  
然且辭以不德惟陳勝吳廣乃囂囂乎急於自王而謂

文王亦為之耶武王伐商師渡孟津會於牧野其所以  
稱先君之命命於諸侯者蓋猶曰文考而已至於武成  
既以柴望告天百工奔走受命於周而後其稱曰我文  
考文王克成厥勲由此觀之則是武王不敢一日妄尊  
其先君而況於文王之自王乎詩曰虞芮質厥成文王  
蹶厥生是亦追稱而已矣史記曰姬乎采芑歸乎田成  
子夫田常之時安知其為成子而稱之故凡以文王周  
公為稱王者皆過也是資後世之篡君而為之藉也陳

賈問於孟子曰周公使管叔監商管叔以商叛知而使之是不仁不知是不知孟子曰周公弟也管叔兄也周公之過不亦宜乎從孟子之說則是周公未免於有過也夫管叔之叛非逆也是其知不足以深知周公而已矣周公之誅非疾之也其勢不得不誅也故管蔡非所謂大惡也兄弟之親而非有大惡則其道不得不封管蔡之封在武王之世也武王之世未知有周公成王之事苟無周公成王之事則管蔡何從而叛周公何從而

誅之故曰周公居禮之變而處聖人之不幸也

此與歐陽修泰誓論明文武周公之心並為扶翼君臣  
大義之至文決浮雲掃朦景昭昭然揭日月以行者也

御選唐宋文醇卷四十一



欽定四庫全書薈要

御選唐宋文醇卷四十二目錄

眉山蘇軾文五

論

荀卿論

韓非論

留侯論

賈誼論

聖祖御評  
謂人性  
卿學術  
又推極  
據精詳  
也

鼂錯論

續歐陽子朋黨論

屈到嗜芰論

惡誠苟  
之偏此  
之理  
非苛論

欽定四庫全書薈要卷一萬九千三百六

集部

御選唐宋文醇卷四十二

眉山蘇軾文五

荀卿論

嘗讀孔子世家觀其言語文章循循莫不有規矩不敢  
放言高論言必稱先王然後知聖人憂天下之深也茫  
乎不知其畔岸而非遠也浩乎不知其津涯而非深也  
其所言者匹夫匹婦之所共知而所行者聖人有所不

能盡也嗚呼是亦足矣使後世有能盡吾說者雖為聖人無難而不能者不失為寡過而已矣子路之勇于貢之辯冉有之智此三者皆天下之所謂難能而可貴者也然三子者每不為夫子之所悅顏淵默然不見其所能若無以異於衆人者而夫子亟稱之且夫學聖人者豈必其言之云爾哉亦觀其意之所嚮而已夫子以為後世必有不能行其說者矣必有竊其說而為不義者矣是故其言平易正直而不敢為非常可喜之論要在

於不可易也昔者常怪李斯事荀卿既而焚滅其書大  
變古先聖王之法於其師之道不啻若寇讐及今觀荀  
卿之書然後知李斯之所以事秦者皆出於荀卿而不  
足怪也荀卿者喜為異說而不讓敢為高論而不顧者  
也其言愚人之所驚小人之所喜也子思孟軻世之所  
謂賢人君子也荀卿獨曰亂天下者子思孟軻也天下  
之人如此其衆也仁人義士如此其多也荀卿獨曰人  
性惡桀紂性也堯舜偽也由是觀之意其為人必也剛

悞不遜而自許太過彼李斯者又特甚者耳今夫小人  
之為不善猶必有所顧忌是以夏商之亡桀紂之殘暴  
而先王之法度禮樂刑政猶未至於絕滅而不可考者  
是桀紂猶有所存而不敢盡廢也彼李斯者獨能奮而  
不顧焚燒夫子之六經烹滅三代之諸侯破壞周公之  
井田此亦必有所恃者矣彼見其師歷詆天下之賢人  
自是其愚以為古先聖王皆無足法者不知荀卿特以  
快一時之論而荀卿亦不知其禍之至於此也其父殺

人報仇其子必且行劫苟卿明王道述禮樂而李斯以其學亂天下其高談異論有以激之也孔孟之論未嘗異也而天下卒無有及者苟天下果無有及者則尚安以求異為哉

軾謂李斯破壞周公之井田然井田之廢不自斯始且井田昉於虞夏亦不得屬之周公此語蓋軾少作未檢點處不可為法

王志堅曰鍾伯敬謂長公此論為荊公作案公此論

刻應詔集乃應制科時作未有荆公事伯敬誤也



祖御評

道德刑名之利

害所見朗徹而

辭筆亦沉鬱絕

倫

# 韓非論

聖人之所為惡夫異端盡力而排之者非異端之能亂天下而天下之亂所由出也昔周之衰有老聃莊周列禦寇之徒更為虛無淡泊之言而治其猖狂浮游之說紛紜顛倒而卒歸於無有由其道者蕩然莫得其當是以忘乎富貴之樂而齊乎死生之分此不得志於天下高世遠舉之人所以放心而無憂雖非聖人之道而其用意固亦無惡於天下自老聃之死百餘年有商鞅韓

非著書言治天下無若刑名之嚴及秦用之終於勝廣之亂教化不足而法有餘秦以不祀而天下被其毒後世之學者知申韓之罪而不知老聃莊周之使然何者仁義之道起於夫婦父子兄弟相愛之間而禮法刑政之原出於君臣上下相忌之際相愛則有所不忍相忌則有所不敢夫不敢與不忍之心合而後聖人之道得存乎其中今老聃莊周論君臣父子之間汎汎乎若萍浮於江湖而適相值也夫是以父不足愛而君不足忌

不忌其君不愛其父則仁不足以懷義不足以勸禮樂  
不足以化此四者皆不足用而欲置天下於無有夫無  
有豈誠足以治天下哉商鞅韓非求為其說而不得得  
其所以輕天下而齊萬物之術是以敢為殘忍而無疑  
今夫不忍殺人而不足以為仁而仁亦不足以治民則  
是殺人不足以為不仁而不仁亦不足以亂天下如此  
則舉天下唯吾之所為刀鋸斧鉞何施而不可昔者夫  
子未嘗一日敢易其言雖天下之小物亦莫不有所畏

今其視天下眇然若不足為者此其所以輕殺人歟太史遷曰申子卑卑施於名實韓子引繩墨切事情明是非其極慘覈少恩皆原於道德之意嘗讀而思之事固有不相謀而相感者莊老之後其禍為申韓由三代之衰至於今凡所以亂聖人之道者其弊固已多矣而未  
知其所終奈何其不為之所也

老子無為清靜莊列一死生解外膠皆所謂遊乎方之外者其與釋氏不以中西而異人誠能識心達本源則

酬酢萬變正其無為清靜也竭力致身正其一死生解  
外膠也豈曰卒歸於無有哉且三界惟心不落有無若  
其分別諸相則言無我者有之矣奚嘗曰無人而謂殺  
人不足以為不仁哉無我故堯舜事業如浮雲之過太  
虛也所為廓然無聖也有人故堯舜其猶病諸也所為  
有一衆生未度不取成佛也申韓反是其於我也拔一  
毛而利天下不為其於人也盡世界之人摩頂放踵以  
利我而亦為之此正逆天地之性拂萬物之情豈特周

孔之所不容正與釋老莊列冰炭不同者雖然孔子言之矣中人以上可以語上中人以下不可以語上猶夫趾有蹠者飛不高趾無蹠者走必躍也盜賊殺人固不得歸咎於古聖之作刀劍然而殺人之器必由刀劍矣二氏之書日在宇宙不能免中人以下者之誤讀則軾此論亦有所裨補歟昔我

世宗憲皇帝有言果能了脫生死則忠必真忠孝必真孝如其不然而徒有見於生無足愛死無足畏則中庸所

謂小人而無忌憚者必其人矣大哉

聖言可息千古之聚訟也

胡居仁曰言非之慘刻由老莊以虛無輕天下來亦  
本太史公原道德之意而發與論李斯禍由荀卿同  
一公案





聖祖御評

以忍字作骨而  
出以快筆豈不  
膽胸中先有此  
一段議論乃因  
留侯而發之耶

# 留侯論

古之所謂豪傑之士者必有過人之節人情有所不能  
忍者匹夫見辱拔劍而起挺身而鬪此不足為勇也天  
下有大勇者卒然臨之而不驚無故加之而不怒此其  
所挾持者甚大而其志甚遠也夫子房受書於圯上之  
老人也其事甚怪然亦安知其非秦之世有隱君子者  
出而試之觀其所以微見其意者皆聖賢相與警戒之  
義而世不察以為鬼物亦已過矣且其意不在書當韓

之亡秦之方盛也以刀鋸鼎鑊待天下之士其平居無  
罪夷滅者不可勝數雖有責育無所復施夫持法太急  
者其鋒不可犯而其勢未可乘子房不忍忿忿之心以  
匹夫之力而逞於一擊之間當此之時子房之不死者  
其間不能容髮蓋亦已危矣千金之子不死於盜賊何  
者其身之可愛而盜賊之不足以死也子房以蓋世之  
才不為伊尹太公之謀而特出於荊軻聶政之計以僥  
倖於不死此圯上之老人所為深惜者也是故倨傲鮮

腆而深折之彼其能有所忍也然後可以就大事故曰  
孺子可教也楚莊王伐鄭鄭伯肉袒牽羊以逆莊王曰  
其君能下人必能信用其民矣遂捨之勾踐之困於會  
稽而歸臣妾於吳者三年而不倦且夫有報人之志而  
不能下人者是匹夫之剛也夫老人者以為子房才有  
餘而憂其度量之不足故深折其少年剛銳之氣使之  
忍小忿而就大謀何則非有生平之素卒然相遇於草  
野之間而命以僕妾之役油然而不怪者此固秦皇之

所不能驚而項籍之所不能怒也觀夫高祖之所以勝而項籍之所以敗者在能忍與不能忍之間而已矣項籍唯不能忍是以百戰百勝而輕用其鋒高祖忍之養其全鋒而待其斃此子房教之也當淮陰破齊而欲自王高祖發怒見於詞色由此觀之猶有剛強不忍之氣非子房其誰全之太史公疑子房以為魁梧竒偉而其狀貌乃如婦人女子不稱其志氣嗚呼此其所以為子房歟

子房自以五世相韓盡散家財求壯士為韓報讐狙擊  
始皇於博浪沙中儻使其時真中始皇子房必與始皇  
俱死而其時斯高之謀未萌扶蘇尚在恬毅諸將無恙  
秦國未可亡也雖其忠肝義胆震動天地而自達者視  
之其行事不猶孺子之為乎子房本豪族公子其時尚  
少未嘗學問而秦法挾書者棄市意其時如東序所陳  
之大訓列國紀載之嘉言民間蕩然無存圯上老人當  
必有所藏者如魯壁之類度子房可授故出以授子房

子房得聞所以定天下為帝王師之道佐高帝滅無道秦而韓之讐果以報矣惠文之世學校未興而書遂無傳於後世耳後世疑為神怪謂所授之書必用兵之術則又與兒童之見無異漢高之取天下也定三秦之後子房始歸漢五年之內賴韓信東取齊北取趙諸侯並叛羽羽食盡乃一舉而滅之自羽食盡以前漢高自將以與羽遇但屢敗耳此時子房不在帷幄間乎然則子房所為定籌決勝者非搏戰之事亦明矣弔詭之士復

偽造黃石公素書三篇以實之皆可怪也





賈誼論

非才之難所以自用者實難惜乎賈生王者之佐而不能自用其才也夫君子之所取者遠則必有所待所就者大則必有所忍古之賢人皆有可致之才而卒不能行其萬一者未必皆其時君之罪或者其自取也愚觀賈生之論如其所言雖三代何以遠過得君如漢文猶且以不用死然則是天下無堯舜終不可以有所為耶仲尼聖人歷試於天下苟非大無道之國皆欲勉強扶

持庶幾一日得行其道將之荆先之以冉有申之以子  
夏君子之欲得其君如此其勤也孟子去齊三宿而後  
出晝猶曰王其庶幾召我君子之不忍棄其君如此其  
厚也公孫丑問曰夫子何為不豫孟子曰方今天下舍  
我其誰哉而吾何為不豫君子之愛其身如此其至也  
夫如此而不用然後知天下之果不足與有為而可以  
無憾矣若賈生者非漢文之不用生生之不能用漢文  
也夫絳侯親握天子璽而授之文帝灌嬰連兵數十萬

以決劉呂之雄雌又皆高帝之舊將此其君臣相得之分豈特父子骨肉手足哉賈生洛陽之少年欲使其一朝之間盡棄其舊而謀其新亦已難矣為賈生者上得其君下得其大臣如絳灌之屬優游浸漬而深交之使天子不疑大臣不忌然後舉天下而惟吾之所欲為不過十年可以得志安有立談之間而遽為人痛哭哉觀其過湘為賦以弔屈原紆鬱憤悶趯然有遠舉之志其後卒以自傷哭泣至於天絕是亦不善處窮者也夫謀

之一不見用安知終不復用也不知默默以待其變而自殘至此嗚呼賈生志大而量小才有餘而識不足也古之人有高世之才必有遺俗之累是故非聰明睿哲不惑之主則不能全其用古今稱符堅得王猛於草茅之中一朝盡斥去其舊臣而與之謀彼其匹夫略有天下之半以此哉愚深悲賈生之志故備論之亦使人君得如賈誼之臣則知其有狷介之操一不見用則憂傷病沮不能復振而為賈生者亦慎其所發哉

史稱神宗欲驟用軾韓琦不欲壞成例沮之軾以此終身德琦嗚呼若軾者真可謂自愛其身者歟作賈誼論宋人謂在其晚年觀軾流離顛沛至挑菜度日夕宿樹下而若將終身怡然自得與賈誼之賦鵬鳥投文弔屈原者異矣當日仁宗得軾對策退朝色喜皇后請其故曰為子孫得賢宰相以故神宗雖惑於讒未嘗不終身眷眷於軾比賈誼之見賞於文帝而終不得柄用者殆髣髴焉軾雖知命不憂乎然篇末數語俯仰古今自傷

而傷他人者至矣若夫賈誼弔屈原賦鵬鳥誠紆鬱憤悶不能見道之明驗至其哭泣歲餘而死則以梁王墜馬死而自傷為傳之無狀也賈生食人之祿忠人之事一有過誤引為已責其心且謂傳梁王而王至墜馬天其天年則平日所自許一旦柄用可以手致太平者皆謬妄也哭泣歲餘亦死此淚當與長叔碧血同寶矣其忠厚惻怛廉節志氣之耿光可貫日月乃軾不察史氏所稱亦死者承梁王死而言而轉以此誚誼非篤論矣

梁王未墜馬死以前誼何嘗自傷不用而哭泣哉





# 鼂錯論

天下之患最不可為者名為治平無事而其實有不測之憂坐觀其變而不為之所則恐至於不可救起而強為之則天下扭於治平之安而不吾信惟仁人君子豪傑之士為能出身為天下犯大難以求成大功此固非勉強期月之間而苟以求名者之所能也天下治平無故而發大難之端吾發之吾能收之然後能免難於天下事至而循循焉欲去之使他人任其責則天下之禍

必集於我昔者鼂錯盡忠為漢謀弱山東之諸侯諸侯  
並起以誅錯為名而天子不察以錯為說天下悲錯之  
以忠而受禍而不知錯之有以取之也古之立大事者  
不惟有超世之才亦必有堅忍不拔之志昔禹之治水  
鑿龍門決大河而放之海方其功之未成也蓋亦有潰  
冒衝突可畏之患惟能前知其當然事至不懼而徐為  
之所是以得至於成功夫以七國之強而驟削之其為  
變豈足怪哉錯不於此時捐其身為天下當大難之衝

而制吳楚之命乃為自全之計欲使天子自將而已居  
守且夫發七國之難者誰乎已欲求其名安所逃其患  
以自將之至危與居守之至安已為難首擇其至安而  
遺天子以其至危此忠臣義士所以憤惋而不平者也  
當此之時雖無袁盎錯亦不免於禍何者已欲居守而  
使人主自將以情而言天子固已難之矣而重違其議  
是以袁盎之說得行於其間使吳楚反錯以身任其危  
日夜淬礪東向而待之使不至於累其君則天子將恃

之以為無恐雖有百袁盎可得而間哉嗟夫世之君子  
欲求非常之功則無務為自全之計使錯自將而擊吳  
楚未必無功惟其欲自固其身而天子不悅姦臣得以  
乘其隙錯之所以自全者乃其所以自禍歟

七國削亦反不削亦反削則變速而禍小不削則變遲  
而禍大此世所以傷錯之忠也雖然明知削之則反矣  
而不為備反計乎四顧羣臣既無可屬百萬兵者而可  
輕削之以激其反乎況有周亞夫之可屬百萬兵而不

知孰云智囊也且夫宗社者猶人之神魂也百姓者猶人之肢體也天下有殘肢體以安神魂之理乎則亦豈有殘百姓以安宗社之理也聖賢處此豈果舍激之反而滅之之外無他道乎錯亦可為未能操刀而輕一割矣錯父曰劉氏安鼂氏危矣天下騷然京師幾喋血劉氏果足為安哉

茅坤曰錯之誤在夙有怨於盎而欲借吳之反以誅之此殺機也鬼瞰其室矣何也以錯之學本刑名故

也

續歐陽子朋黨論

歐陽子曰小人欲空人之國必進朋黨之說嗚呼國之  
將亡此其徵歟禍莫大於權之移人而君莫危於國之  
有黨有黨則必爭爭則小人者必勝而權之所歸也君  
安得不危哉何以言之君子以道事君人主必敬之而  
疎小人惟予言而莫予違人主必狎之而親疎者易簡  
而親者難睽也而君子不得志則奉身而退樂道不仕  
小人者不得志則徼倖復用惟怨之報此其所以必勝

也蓋嘗論之君子如嘉禾也封殖之甚難而去之甚易  
小人如惡草也不種而生去之復蕃世未有小人不除  
而治者也然去之為最難斥其一則援之者衆盡其類  
則衆之致怨也深小者復用而肆威大者得志而竊國  
善人為之掃地世主為之屏息譬斷蛇不死刺虎不斃  
其傷人則愈多矣齊田氏魯季孫是已齊魯之執事莫  
非田季之黨也歷數君不忘其誅而卒之簡公弒昭哀  
失國小人之黨其不可除也如此而漢黨錮之獄唐白



馬之禍忠義之士斥死無餘君子之黨其易盡也如此  
使世主知易盡者之可戒而不可除者之可懼則有瘳  
矣且夫君子者世無若是之多也小人者亦無若是之  
衆也凡才智之士銳於功名而嗜於進取者隨所用耳  
孔子曰仁者安仁智者利仁未必皆君子也再有從夫  
子則為門人之選從季氏則為聚斂之臣唐柳宗元劉  
禹錫使不陷叔文之黨其高才絕學亦足以為唐名臣  
矣昔樂懷子得罪於晉其黨皆出奔樂王鮒謂范宣子

曰盍反州綽邢蒯勇士也宣子曰彼藥氏之勇也余何  
獲焉王鮒曰子為彼藥氏乃子之勇也嗚呼宣子蚤從  
王鮒之言豈獨獲二子之勇且安有曲沃之變哉愚以  
謂治道去泰甚耳苟黜其首惡而貸其餘使才者不失  
富貴不才者無所致憾將為吾用之不暇又何怨之報  
乎人之所以為盜者衣食不足耳農夫市人焉保其不  
為盜而衣食既足盜豈有不能返農夫市人也哉故善  
除盜者開其衣食之門使復其業善除小人者誘以富

貴之道使墮其黨以力取威勝者蓋未嘗不反為所噬也曹參之治齊曰慎無擾獄市獄市姦人之所容也知此亦庶幾於善治矣姦固不可長而亦不可不容也若姦無所容君子豈久安之道哉牛李之黨徧天下而李德裕以一夫之力欲窮其類而致之必死此其所以不旋踵罹仇人之禍也姦臣復熾忠義益衰以力取威勝者果不可耶愚是以續歐陽子之說而為君子小人之戒

韓范富司馬諸賢忘身為國經理天下事宵小懼不見容則屢以朋黨目之冀罔上以行其私歐陽修作朋黨論謂小人無朋惟君子有之蓋謂小人之交必以爭利而壞而君子之交必以義合而成徒欲矯當時之謬論動人主之傾聽而不自知其言之有弊也君子不黨君子亦黨乎吾

世宗憲皇帝作朋黨論深斥其非夫豈不知修之意非欲為朋黨哉特以其激烈過當之言足使讀者誤會而小

人無朋之朋方將藉口於修以亂黑白蓋凡所以斥修者正修言外之意所欲表襮於後世而未能者也軾殆亦有疑於其師之言義未圓足而不可為訓故為此續論歟蓋嘗讀大易而知文王周孔之心於朋黨實三致意也其在坤曰利西南得朋東北喪朋謂西南者坤代乾致役之地非合衆力不足以濟故利得朋東方者受命之先北方者告成之候稟令歸功已無私焉而何有於朋類故利喪朋也其在比六三曰比之匪人謂六三

應上六上在五上志不在君故為比之無首六三應之  
故為比之匪人也其在泰之九二曰包荒用馮河不遐  
遺朋亡得高于中行包荒者寬裕溫柔也用馮河者發  
強剛毅也不遐遺者文理密察也然必終之以朋亡然  
後齋莊中正而大公無我之道備上下可以交而泰否  
則所為包荒之寬仁馮河之勇斷不遐遺之縝密皆不  
出於中正不出於中正則胥無足言矣若夫六四翩翩  
不富以其鄰不戒以孚云者戒六四以當下從三陽之

正而不當上合二陰之鄰也其在同人曰同人于野亨  
于野云者猶路人也其六二曰同人于宗吝于宗云者  
猶宗黨也理之在天下華夏蠻貊本為一身豈必于其  
宗黨乃可以同乎同人于宗吝之道矣于野同人非廓  
然大公之謂乎其在豫之九四曰由豫大有得勿疑朋  
盍簪九四一陽為豫之主天下由之以豫者也任大責  
重非獨力所能必得同德者以自輔非開誠布公奚以  
來諸賢之益故戒以勿疑則朋盍簪也然則苟非由豫

大有得者固無所謂朋蓋簪也不待言明矣其在蹇之六二曰王臣蹇蹇匪躬之故九五曰大蹇朋來六二之蹇蹇者即九五之朋也其朋於九五者匪躬之故也大蹇匪朋其奚濟然惟濟天下之大蹇者朋來而非有所私否則但以喪朋為利也其在解之九四曰解而拇朋至斯孚九四為震主解天下之難者必解去在下之小人而後君子之朋斯至解以緩難非朋奚濟解而拇者戒有所暱比也其在渙之六三曰渙其躬无悔克己復



禮仁也其躬尚渙則於人無論也六四曰渙其羣元吉  
渙有丘匪夷所思君子無一人與為羣者而惟理之是  
視所為渙其羣也而理者人之所同得則天下之大四  
海之廣無一人而非其羣也故曰渙有丘匪夷所思也  
所以為大羣者即其所為渙羣也六十四卦中戒朋黨  
者顯言之則十居二三焉若其微言之者又未可以悉  
數文王周孔之心於此諄諄若是然則天下之治否寧  
不以此為樞機乎為人君為人臣者其曷可以弗思



屈到嗜芰論

屈到嗜芰有疾召其宗老而屬之曰祭我必以芰及祥  
宗老將薦芰屈建命去之君子曰不違而道唐柳宗元  
非之曰屈子以禮之末忍絕其父將死之言且禮有齋  
之日思其所樂思其所嗜子木去芰安得為道甚矣柳  
子之陋也子木楚卿之賢者也夫豈不知為人子之道  
事死如事生況於將死丁寧之言棄而不用人情之所  
忍乎是必有大不忍於此者而奪其情也夫死生之際

聖人嚴之薨於路寢不死於婦人之手至於結冠纓啓  
手足之末不敢不勉其於死生之變亦重矣父子平日  
之言可以恩掩義至於死生至嚴之際豈容以私害公  
乎曾子有疾稱君子之所貴乎道者三孟僖子卒使其  
子學禮於仲尼管仲病勸桓公去三豎夫數君子之言  
或主社稷或勤於道德或訓其子孫雖所趣不同然皆  
篤於大義不私其躬也如是今赫赫楚國若敖氏之賢  
聞於諸侯身為正卿死不在民而口腹是憂其為陋亦

甚矣使子木行之國人誦之太史書之天下後世不知  
夫子之賢而惟陋是聞子木其忍為此乎故曰是必有  
大不忍者而奪其情也然禮之所謂思其所樂思其所  
嗜此言人子追思之道也曾皙嗜羊棗而曾子不忍食  
父沒而不能讀父之書母沒而不能執母之器皆人子  
之情自然也豈待父母之命耶今薦芟之事若出於子  
則可自其父母則為陋耳豈可以飲食之故而成父莫  
大之陋乎曾子寢疾曾元難於易簣曾子曰君子之愛

人也以德細人之愛人也以姑息若以柳子之言為然是曾元為孝子而曾子顧禮之末易簣於病草之中為不仁之甚也中行偃死視不可舍范宣子盟而撫之曰事吳敢不如事主猶視樂懷子曰主苟終所不嗣事於齊者有如河乃瞑嗚呼范宣子知事吳為忠於主而不知報齊以成夫子憂國之美其為忠則大矣古人以愛惡比之美疢藥石曰石猶生我疢之美者其毒滋多由是觀之柳子之愛屈到是疢之美子木之違父命藥石

也哉

人倫以理治不以欲治唯其理也則與生俱生生不息  
乾坤不毀斯道不壞若其欲也則雖屬毛離裡生同  
胞乳同懷而若秦越然各有所嗜不可以相通各徇其  
欲則各化於物道不可見而乾坤或幾於息矣毫釐之  
差千里之謬非細故也孟懿子問孝子曰生事之以禮  
死葬之以禮祭之以禮天下之為人父而不欲以禮自  
居者豈尠哉事之以禮則曰是不善事我也葬祭之以

禮則人又議曰是違若親之遺命也然則孔子之言亦有不可行者乎屈到嗜芰而子木不以祭亦祭之以禮而已何可議哉柳宗元非之蘓軾辨之當矣而胡友信又以軾為非彼亦一是非此亦一是非盍折衷於孔子

御選唐宋文醇卷四十二





總校官庶吉士臣侍朝

校對官助教臣汪錫魁

謄錄監生臣沈浩

欽定四庫全書薈要

集部

御選唐宋文醇卷四十三

四

詳校官原任主事

臣

李斯咏



欽定四庫全書薈要

御選唐宋文醇卷四十三目錄

眉山蘇軾文六

論

論養士

論魯隱公

論隱公里克李斯鄭小同王允之

論管仲



論周東遷

論商鞅

論始皇漢宣李斯

論項羽范增

欽定四庫全書薈要卷一萬九千三百七

集部

御選唐宋文醇卷四十三

眉山蘇軾文六

論養士

春秋之末至於戰國諸侯卿相皆爭養士自謀夫說客  
談天雕龍堅白同異之流下至擊劍扛鼎雞鳴狗盜之  
徒莫不賓禮靡衣玉食以館於上者何可勝數越王勾  
踐有君子六千人魏無忌齊田文趙勝黃歇呂不韋皆

有客三千人而田文招致任俠姦人六萬家於薛齊稷  
下談者亦千人魏文侯燕昭王太子丹皆致客無數下  
至秦漢之間張耳陳餘號多士賓客廝養皆天下豪俊  
而田橫亦有士五百人其畧見於傳記者如此度其餘  
當倍官吏而半農夫也此皆姦民蠹國者民何以支而  
國何以堪乎蘓子曰此先王之所不能免也國之有姦  
猶鳥獸之有鷙猛昆蟲之有毒螫也區處條理使各安  
其處則有之矣鋤而盡去之則無是道也吾考之世變

知六國之所以久存而秦之所以速亡者蓋出於此不可以不察也夫智勇辯力此四者皆天民之秀傑也類不能惡衣食以養人皆役人以自養者也故先王分天下之富貴與此四者共之此四者不失職則民靖矣四者雖異先王因俗設法使出於一三代以上出於學戰國至秦出於客漢以後出於郡縣吏魏晉以來出於九品中正隋唐至今出於科舉雖不盡然取其多者論之六國之君虐用其民不減始皇二世然當是時百姓無

一人叛者以凡民之秀傑者皆以客養之不失職也其  
力耕以奉上皆椎魯無能為者雖欲怨叛而莫為之先  
此其所以少安而不即亡也始皇初欲逐客用李斯之  
言而止既并天下則以客為無用於是任法而不任人  
謂民可以恃法而治謂吏不必才取能守吾法而已故  
墮名城殺豪傑民之秀異者散而歸田畝向之食於四  
公子呂不韋之徒者皆安歸哉不知其能槁項黃馘而  
老死於布褐乎抑將輟耕太息以俟時也秦之亂成於



二世然使始皇知畏此四人者有以處之使不失職秦之亡不至若此之速也縱百萬虎狼於山林而饑渴之不知其將噬人世以始皇為智吾不信也楚漢之禍生民盡矣豪傑宜無幾而代相陳豨從車千乘蕭曹為政莫之禁也至文景武帝之世法令至密矣然吳王濞淮南梁王魏其武安之流皆爭致賓客世主不問也豈懲秦之禍以為爵祿不能盡縻天下之士故少寬之使得或出於此也耶若夫先王之政則不然曰君子學道則

愛人小人學道則易使也嗚呼此豈秦漢之所及也哉  
軾以智勇辯力比之虎狼疑若言之無擇者間嘗論之  
物得氣質之偏人得氣質之全偏全之義非即善惡之  
謂也偏善偏惡之謂偏全善全惡之謂全虎豹終日不  
殺則跳踉大叫以洩其怒必撲殺一物乃已麒麟騶虞  
不踐生草不履生蟲間世一出往往餓死兩者決不可  
以相假人則不然其善量可以彌天地則其惡量亦可  
以彌天地如掌之正反然故蠢愚冥頑者能小善而不

能大善則亦能小惡而不能大惡智勇辯力者其能為  
善大則其能為惡亦大善可麒麟騶虞惡亦可虎狼也  
是以為人上者凜乎若朽索之馭六馬



# 論魯隱公

魯隱公元年不書即位攝也公子翬請殺桓公公曰為其少故也吾將授之矣使營菟裘吾將老焉翬懼反譖公於桓而使賊弑公歐陽子曰隱公非攝也使隱而果攝也則春秋不書為公春秋書為公則隱非攝無疑也蘓子曰非也春秋魯之信史隱攝而桓弑著於史也詳矣周公攝而克復子者也以周公薨故不稱王隱公攝而不克復子者也以魯公薨故稱公史有謚國有廟春

秋獨得不稱公乎然則隱公之攝也禮歟曰禮也何自聞之曰聞之孔子曾子問曰君薨而世子生如之何孔子曰卿大夫士從攝主北面於西階南何謂攝主曰古者天子諸侯卿大夫士之世子未生而死則其弟若兄弟之子以當立者為攝主子生而女也則攝主立男也則攝主退此之謂攝主古之人有為之者季康子是也季桓子且死命其臣正常曰南孺子之子男也則以告而立之女也則肥也可桓子卒康子即位既葬康子在

朝南氏生男正常載以如朝告曰夫子有遺言命其圉

臣曰南氏生男則以告於君與大夫而立之今生矣男  
也敢告康子請退康子之謂攝主古之道也孔子行之  
自秦漢以來不修是禮也而以母后攝孔子曰惟女子  
與小人為難養也使與聞外事且不可曰牝雞之晨惟  
家之索而況可使攝位而臨天下乎女子為政而國安  
惟齊之君王后吾宋之曹高向也蓋亦千一矣自東漢  
馬鄧不能無譏而漢吕后魏胡武靈唐武氏之流蓋不

勝其亂王莽楊堅遂因以易姓由是觀之豈若攝主之  
庶幾乎使母后而可信也則攝主何為而不可信若均  
之不可信則攝主取之猶吾先君之子孫也不猶愈於  
異姓之取哉或曰君薨百官總已以聽於冢宰三年安  
用攝主曰非此之謂也嗣天子長矣宅憂而未出令則  
以禮從冢宰若太子未生生而弱未能君也則三代之  
禮孔子之學決不以天下付異姓其付之攝主也夫豈  
非禮而周公行之歟故隱公亦攝主也鄭玄儒之陋者



也其傳攝主也曰上卿代君聽政者也使子生而女則上卿豈繼世者乎蘇子曰攝主先王之令典孔子之法言也而世不知習見母后之攝也而以為當然故吾不可不論以待後世之君子

秦燔詩書而先王之典章茫然不可考漢興未幾而呂后遂以女子居攝幾移漢祚當日匈奴尚知其非而為嫖娼之語以相誚刺乃漢之公卿拱手以聽莫敢誰何亦人倫之大變矣後遂以為典制至於唐武后後先相

望遺臭萬年宋制仍之雖屢得賢后遠邁漢唐然終不可以訓也此程子傳易所以致意於坤六五之黃裳而謂非常之變不可言也歟究其所以然實以古人居攝之制廢而主少國疑國無與屬則以為莫如母后親而不知悖陰陽之義即逆天地之性而必不可行也軾之論千古不易矣

論隱公里克李斯鄭小同王允之

公子翬請殺桓公以求太宰隱公曰為其少故也吾將授之矣使營菟裘吾將老焉翬懼反譖公於桓公而殺之蘓子曰盜以兵擬人人必殺之夫豈獨其所擬塗之人皆捕擊之矣塗之人與盜非仇也以為不擊則盜且并殺已也隱公之智曾不若塗之人哀哉隱公惠公繼室之子也其為非嫡與桓均耳而長於桓隱公追先君之志而授國焉可不謂仁人乎惜乎其不敏於智也使

隱公誅翬而讓桓雖夷齊何以尚茲驪姬欲殺申生而難里克則施優來之二世欲殺扶蘓而難李斯則趙高來之此二人之智若出一人而受禍亦不少異里克不免於惠公之誅李斯不免於二世之虐皆無足哀者吾獨表而出之以為世戒君子之為仁義也非有計於利害然君子所為義利常兼而小人反是李斯聽趙高之謀非其本意獨畏蒙氏之奪其位故勉而聽高使斯聞高之言即召百官陳六師而斬之其德於扶蘓豈有既

乎何蒙氏之足憂釋此不為而具五刑於市非下愚而何嗚呼亂臣賊子猶蝮蛇也其所螫草木猶足以殺人況其所噬齧者歟鄭小同為高貴鄉公侍中嘗詣司馬師師有密疏未屏也如廁還問小同見吾疏乎曰不見師曰寧我負卿無卿負我遂酖之王允之從王敦夜飲辭醉先寢敦與錢鳳謀逆允之已醒悉聞其言慮敦疑已遂大吐衣面皆污敦果照視之見允之卧吐中乃已哀哉小同殆哉岌岌乎允之也孔子曰危邦不入亂邦

不居有以也夫吾讀史得魯隱公晉里克秦李斯鄭小  
同王允之五人感其所遇禍福如此故特書其事後之  
君子可以覽觀焉

軾謂亂臣賊子猶蝮蛇不殺之必被其毒洵矣然謂李  
斯殺趙高可以捄死固不知死非可以殺人捄也況李  
斯亦未始非蝮蛇以蝮蛇殺蝮蛇而可以捄死哉斯陳  
六師以斬高扶蘓寧不德斯於一時然而扶蘓虎子蒙  
氏虎臣安知他日不以別故具斯五刑哉孔子曰篤信

好學守死善道繼之曰危邦不入亂邦不居天下有道則見無道則隱君子之篤信好學信何信乎信夫死生禍福在天在人其於我無豪釐之損益惟現在所居之位各有當然自然之則為我所必由之道則不可以或過或不及也學何學乎學夫死生禍福之當前一不以動我心而唯於我現在所居之位盡其當然自然之道而毋或過毋或不及也是故天下有道則見見者道也天下無道則隱隱者道也入危邦居亂邦必先有離經

叛道之心而後入且居之既入而居之安往而得死所哉若夫龍逢比干之流則其現在所居之位即在危邦亂邦之中其死也正所為守死善道而不可以同年語也軾所論五人惟魯隱公不殺羽父則然矣若里克李斯者何暇與議誅亂賊哉若夫鄭小同王允之一死一不死皆無可哀蓋既置身於蝮蛇之側必非所為篤信好學守死善道之人也善哉孟子之言曰夫人必自侮然後人侮之



# 論管仲

鄭太子華言於齊桓公請去三族而以鄭為內臣公將許之管仲不可公曰諸侯有討於鄭未捷苟有釁從之不亦可乎管仲曰君若綏之以德加之以訓辭而率諸侯以討鄭鄭將覆亡之不暇豈敢不懼若總其罪人以臨之鄭有辭矣公辭子華鄭伯乃受盟蘓子曰大哉管仲之相桓公也辭子華之請而不違曹沫之盟皆盛德之事也齊可以王矣恨其不學道不自誠意正心以刑

其國使家有三歸之病而國有六嬖之禍故桓公不王而孔子小之然其予之也亦至矣曰桓公九合諸侯不以兵車管仲之力也如其仁曰仲尼之徒無道桓文之事者孟子蓋過矣吾讀春秋以下史得七人焉皆盛德之事可以為萬世法又得八人焉皆反是可以為萬世戒故具論之太公之治齊也舉賢而尚功周公曰後世必有篡弑之臣天下誦之齊其知之矣田敬仲之始生也周史筮之其奔齊也齊懿氏卜之皆知其當有齊國

篡弑之疑蓋萃於敬仲矣然桓公管仲不以是廢之乃  
欲以為卿非盛德能如此乎故吾以謂楚成王知晉之  
必霸而不殺重耳漢高祖知東南之必亂而不殺吳王  
漢晉武帝聞齊王攸之言而不殺劉元海苻堅信王猛  
而不殺慕容垂唐明皇用張九齡而不殺安祿山皆盛  
德之事也而世之論者則以謂此七人者皆失於不殺  
以啓亂吾以為不然七人者皆自有以致敗亡非不殺  
之過也齊景公不煩刑重賦雖有田氏齊不可取楚成

王不用子玉雖有晉文公兵不敗漢景帝不害吳太子  
不用鼂錯雖有吳王濞無自發晉武帝不立孝惠雖有  
劉元海不能亂苻堅不貪江左雖有慕容垂不敢叛明  
皇不用李林甫楊國忠雖有安祿山亦何能為秦之由  
余漢之金日磾唐之李光弼渾瑊之流皆蕃種也何負  
於中國哉而獨殺元海祿山乎且夫自今而言之則元  
海祿山死有餘罪自當時言之則不免為殺無罪豈有  
天子殺無罪而不得罪於天下者上失其道塗之人皆

敵國也天下豪傑其可勝既乎漢景帝以鞅鞅而殺周  
亞夫曹操以名重而殺孔融晉文帝以卧龍而殺嵇康  
晉景帝亦以名重而殺夏侯玄宋明帝以族大而殺王  
或齊後主以謠言而殺斛律光唐太宗以讖而殺李君  
美武后亦以謠言而殺裴炎世皆以為非也此八人者  
當時之慮豈非憂國備亂與憂元海祿山者同乎久矣  
世之以成敗為是非也故凡嗜殺人者必以鄧侯不殺  
楚子為口實以鄧之微無故殺大國之君使楚人舉國

而仇之其亡不愈速乎吾以謂為天下如養生憂國備  
亂如服藥養生者不過慎起居飲食節聲色而已節慎  
在未病之前而服藥在已病之後今吾憂寒疾而先服  
烏喙憂熱疾而先服甘遂則病未作而藥殺人矣彼八  
人者皆未病而服藥者也

至言篤論可為豈弟君子矣

# 論周東遷

太史公曰學者皆稱周伐紂居洛邑其實不然武王營之成王使召公卜居九鼎焉而周復都豐鎬至犬戎敗幽王周乃東徙於洛蘓子曰周之失計未有如東遷之繆者也自平王至於亡非有大無道者也髡王之神靈諸侯服享然終以不振則東遷之過也昔武王克商遷九鼎於洛邑成王周公復增營之周公既沒蓋君陳畢公更居焉以重王室而已非有意於遷也周公欲葬成

周而成王葬之畢此豈有意於遷哉今夫富民之家所以遺其子孫者田宅而已不幸而有敗至於乞假以生可也然終不敢議田宅今平王舉文武成康之業而大棄之此一敗而鬻田宅者也夏商之王皆五六百年其先王之德無以過周而後王之敗亦不減周幽厲然至於桀紂而後亡其未亡也天下宗之不如東周名存而實亡也是何也則不鬻田宅之效也盤庚之遷也復殷之舊也古公遷於岐方是時周人如狄人也逐水草而



居豈所難哉衛文公東徙渡河恃齊而存耳齊遷臨淄  
晉遷於絳於新田皆其盛時非有所畏也其餘避寇而  
遷都未有不亡雖不即亡未有能復振者也春秋之時  
楚大饑羣蠻叛之申息之北門不啟楚人謀徙於阪高  
為賈曰不可我能往寇亦能往於是乎以秦人巴人滅  
庸而楚始大蘓峻之亂晉幾亡矣宗廟宮室盡為灰燼  
溫嶠欲遷都豫章三吳之豪欲遷會稽將從之矣獨王  
導不可曰金陵王者之都也王者不以豐儉移都若弘

衛文大帛之冠何適而不可不然雖樂土為墟矣且止  
寇方彊一旦示弱竄於蠻越望實皆喪矣乃不果遷而  
晉復安賢哉導也可謂能定大事矣嗟夫平王之初周  
雖不如楚之彊顧不愈於東晉之微乎使平王有一王  
導定不遷之計收豐鎬之遺民而修文武成康之政以  
形勢臨東諸侯齊晉雖彊未敢貳也而秦何自霸哉魏  
惠王畏秦遷於大梁楚昭王畏吳遷於郢頃襄王畏秦  
遷於陳考烈王畏秦遷於壽春皆不復振有亡徵焉東

漢之末董卓劫帝遷於長安漢遂以亡近世李景遷於豫章亦亡吾故曰周之失計未有如東遷之繆者也

儲欣曰并南宋百五十年小朝廷侮辱公亦若燭照而數計也異哉或謂勢可以不遷而遷者周平也勢不可不遷而遷者宋高也嗟乎使果不可不遷也當日京師已破宗留守何累表而請還南陽議幸李相國何慷慨而拜疏觀留守且死大呼渡河而宋非不可不遷章章明矣史載高宗置先生文集於左右披

覽循環而於此論若未嘗寓目者又可慨也

# 論商鞅

商鞅用於秦變法定令行之十年秦民大悅道不拾遺  
山無盜賊家給人足民勇於公戰怯於私鬪秦人富彊  
天子致胙於孝公諸侯畢賀蘇子曰此皆戰國之游士  
邪說詭論而司馬遷闇於大道取以為史吾嘗以為遷  
有大罪二其先黃老後六經退處士進姦雄蓋其小小  
者耳所謂大罪二則論商鞅桑弘羊之功也自漢以來  
學者耻言商鞅弘羊而世主獨甘心焉皆陽諱其名而

陰用其實甚者則名實皆宗之庶幾其成功此司馬遷之罪也秦固天下之彊國而孝公亦有志之君也修其政刑十年不為聲色畋游之所敗雖微商鞅有不富彊乎秦之所以富彊者孝公敦本力穡之效非鞅流血剝骨之功也而秦之所以見疾於民如豺虎毒藥一夫作難而子孫無遺種則鞅實使之至於桑弘羊斗筭之才穿窬之智無足言者而遷之言曰不加賦而上用足善乎司馬光之言也曰天下安有此理天地所生財貨百

物止有此數不在民則在官譬如雨澤夏澇則秋旱不加賦而上用足不過設法陰奪民利其害甚於加賦也二子之名在天下如蛆蠅糞穢也言之則污口舌書之則汙簡牘二子之術用於世者滅國殘民覆族亡軀者相踵也而世主獨甘心焉何哉樂其言之便已也夫堯舜禹湯世主之父師也諫臣弼士世主之藥石也恭敬慈儉勤勞憂畏世主之繩約也今使世主日臨父師而親藥石履繩約非有所樂也故為商鞅弘羊之術者必

先鄙堯舜而陋禹也曰所謂賢主者專以天下適已而已此世主所以人人甘心而不悟也世有食鍾乳鳥喙而縱酒色以求長年者蓋始於何晏晏少而富貴故服寒食散以濟其欲無足怪者彼之所為足以殺身滅族者日相繼也得死於寒食散豈不幸哉而吾獨何為效之世之服寒食散疽背嘔血者相踵也用商鞅桑弘羊之術破國亡宗者皆是也然而終不悟者樂其言之美便而忘其禍之慘烈也



周語曰君人者將導利而布之上下者也孔子曰有國  
有家者不患寡而患不均不患貧而患不安惟其患不  
均也故導而布之以使之均惟其患不安也故布而均  
之以使之安司牧斯民者為國家理財為利民用厚民  
生計耳豈計他哉古人有言食前方丈所嘗不過一臠  
廣廈萬間所居不過尺地人君雖玉食萬方要豈有異  
於人皇矣上帝肯使一人恣於民上以縱其淫而棄天  
地之性若曰非以自奉吾以富國益所為惑者矣夫人

各私一己故名己之肢體以為身私其眷屬故名眷屬之所聚處者以為家推而及於天下則無所私無所私而為天下所係屬之一人則名我民之所托足者以為國國者非他人民而已今取人民之所以養生送死之具頭會而箕斂之銖銖兩兩以成鉅萬而局鐫於一處曰吾以富國其民至於凍餒而莫之省憂是何異聚粟帛而害之使一家凍餒而曰吾以富家取金錢而握之使一身凍餒而曰吾以富身哉亦可為愚矣漢文景之

世千里不持糧孝武用桑生而亭候蕭然矣宋真仁之  
世雖未及文景而百年休養其民衣食滋殖神宗用安  
石而戶口逃亡十室九空矣是謂之貧國則可耳號為  
富國何富之有哉以筵為楹以厲為西施人之顛倒往  
徃如是禹訓曰內作色荒外作禽荒甘酒嗜音峻宇雕  
墻有一於此未或不亡夫是數者之致亡也蓋必因是  
而求桑王富國之術以遂其縱欲之樂也如其不然雖  
亡其身未必能亡其國若夫直言桑王富國之術則亦

不必有是數者而不亡於其身必亡於其子孫矣豈特  
能貧國已哉

論始皇漢宣李斯

秦始皇時趙高有罪蒙毅按之當死始皇赦而用之長  
子扶蘇好直諫上怒使監蒙恬兵於上郡始皇東游會  
稽並海走瑯琊少子胡亥李斯蒙毅趙高從道病使蒙  
毅還禱山川未及還上崩李斯趙高矯詔立胡亥殺扶  
蘇蒙恬蒙毅卒以亡秦蘓子曰始皇制天下輕重之勢  
使內外相形以禁奸備亂可謂密矣蒙恬將三十萬人  
威震北方扶蘓監其軍而蒙毅侍帷幄為謀臣雖有大

姦賊敢睥睨其間哉不幸道病禱祠山川尚有人也而  
遣蒙毅故高斯得成其謀始皇之遣毅毅見始皇病太  
子未立而去左右皆不可以言智然天之亡人國其禍  
敗必出於智所不及聖人為天下不恃智以防亂特吾  
無致亂之道耳始皇致亂之道在用趙高夫閹尹之禍  
如毒藥猛獸未有不裂肝碎首者也自書契以來惟東  
漢呂彊後唐張承業二人號良善豈可望一二於千萬  
以徼必亡之禍哉然世主皆甘心而不悔如漢桓靈唐

肅代猶不足深怪始皇漢宣皆英主亦湛於趙高恭顯之禍彼自以為聰明人傑也奴僕薰腐之餘何能為及其亡國亂朝乃與庸主不異吾故表而出之以戒後世人主如始皇漢宣者或曰李斯佐始皇定天下不可謂不智扶蘇親始皇子秦人戴之久矣陳勝假其名猶足以亂天下而蒙恬持重兵在外使二人不即就誅而復請之則斯高無遺類矣以斯之智而不慮此何哉蘇子曰嗚呼秦之失道有自來矣豈獨始皇之罪自商鞅變

法以殊死為輕典以參夷為常法人臣狼顧脅息以得死為幸何暇復請方其法之行也求無不獲禁無不止鞅自以為軼堯舜而駕湯武矣及其出亡而無所舍然後知為法之敝夫豈獨鞅悔之秦亦悔之矣荆軻之變持兵者孰視始皇環柱而走莫之救者以秦法重故也李斯之立胡亥不復忌二人者知法令之素行而臣子之不敢復請也二人之不敢復請亦知始皇之鷙悍而不可回也豈料其偽也哉周公曰平易近民民必歸之



孔子曰有一言而可以終身行之其恕矣乎夫以忠恕  
為心而以平易為政則上易知而下易達雖有賣國之  
奸無所投其隙倉猝之變無自發焉其令行禁止蓋有  
不及商鞅者矣而聖人終不以彼易此鞅立信於徙木  
立威於棄灰刑其親戚師傅積威信之極以至始皇秦  
人視其君如雷電鬼神不可測也古者公族有罪三宥  
然後寘刑今至使人矯殺其太子而不忌太子亦不敢  
請則威信之過也故夫以法毒天下者未有不反中其

身及其子孫者也漢武始皇皆果於殺者也故其子如扶蘓之仁則寧死而不請如戾太子之悍則寧反而不訴知訴之必不察也戾太子豈欲反者哉計出於無聊也故為二君之子者有死與反而已李斯之智蓋足以知扶蘓之必不反也吾又表而出之以戒後世人主之果於殺者

用宦寺任法律之禍毒痛四海而卒乃身受之孟子所謂仁者以其愛及其所不愛不仁者以其不愛及其所

愛也此文與代張方平上書所論窮兵黷武之禍警後  
世君臣最為深切著明軾之垂光百世宜矣

欽定四庫全書

御選唐宋文醇

卷四十三

論項羽范增

漢用陳平計間疎楚君臣項羽疑范增與漢有私奪其  
權增大怒曰天下事大定矣君王自為之願賜骸骨歸  
卒伍未至彭城疽發背死蘓子曰增之去善矣不去羽  
必殺增獨恨其不蚤耳然則當以何事去增勸羽殺沛  
公羽不聽終以此失天下當於是去耶曰否增之欲殺  
沛公人臣之分也羽之不殺猶有君人之度也增曷為  
以此去哉易曰知幾其神乎詩曰相彼雨雪先集維霰

增之去當於羽殺卿子冠軍時也陳涉之得民也以項  
燕扶蕪項氏之興也以立楚懷王孫心而諸侯叛之也  
以弑義帝且義帝之立增為謀主矣義帝之存亡豈獨  
為楚之盛衰亦增之所與同禍福也未有義帝亡而增  
獨能久存者也羽之殺卿子冠軍也是弑義帝之兆也  
其弑義帝則疑增之本也豈必待陳平哉物必先腐也  
而後蟲生之人必先疑也而後讒入之陳平雖智安能  
間無疑之主哉吾嘗論義帝天下之賢主也獨遣沛公

入關而不遣項羽識卿子冠軍於稠人之中而擢以為  
上將不賢而能如是乎羽既矯殺卿子冠軍義帝必不  
能堪非羽弑帝則帝殺羽不待智者而後知也增始勸  
項梁立義帝諸侯以此服從中道而弑之非增之意也  
夫豈獨非其意將必力爭而不聽也不用其言而殺其  
所立羽之疑增必自是始矣方羽殺卿子冠軍增與羽  
比肩而事義帝君臣之分未定也為增計者力能誅羽  
則誅之不能則去之豈不毅然大丈夫也哉增年已七

十合則留不合則去不以此時明去就之分而欲依羽以成功陋矣雖然增高帝之所畏也增不去項羽不亡嗚呼增亦人傑也哉

君臣之義非可偽為楚懷王之立羽與增臣分定矣項羽矯殺卿子冠軍所為有無君之心而後動於惡增不以此時去及弑義帝江南而增猶為羽謀如故則增之死久矣奚待疽發背哉軾曰增高帝之所畏也增亦人傑也哉夫虎狼之威漢高未必不畏漢高畏虎狼虎狼



亦俊傑耶

御選唐宋文醇卷四十三